

Stichting Monumentenfonds Aruba a informa

A renoba ‘Casita Geel’ y ta bay bira un luga di entretenimento

Durante un conferencia di prensa, directora di Stichting Monumentenfonds Aruba (SMFA), Anne Witsenburg a anuncia cu entrante 1 october 2023 e monumento conoci bao di e nomber Casita Geel tin un huerdo nobo.

Den e ultimo luna SMFA, a traha intensivamente den adaptacion di e edificio pa su funcion nobo y awor e cas di cunucu aki, construi na principio di siglo 20, lo keda converti den un luga di entretenimento pa tanto local como turista bao di e nomber Moonshine Daiquiri Co.

Tonya Shenkin, co-propietario di e luga aki, ta conta cu for di 23 aña pasa cu el a yega Aruba pa prome biaha a bisa su mes cu un dia e lo biba akinan y awor e tin su propio cas na Aruba y su propio negoshi.

E tin experiencia amplio den e industria di clubnan nocturno, caminda cu a mancha cuatro club di su famia den e area di New York/ New Jersey. Asina su pasion pa hospitalidad a cuminsa y semper su meta ta pa e bishitantenan por laga tur nan preocupacion na porta y crea un experiencia memorabel.



Na 2020 durante e pandemia di Covid, el a tuma e decision di sigui su soñonan; construi su propio cas y inicia su propio negoshi na Aruba. Awor ta asina leu cu e ta cla pa comparti su amor pa e isla cu e localnan y turistanan di rond mundo.

Casita Geel ta un cas di cunucu construi na aña 1908 na crusada di Caya Betico Croes y Waterweg, pega cu e actual edificio di Aruba Bank. Probablemente e parti central di e cas a ser construi na 1860 pa un Frances y na 1908 a ser compra pa Sr. Richard Johan

Eman van der Biest, kende tabata casa cu Catharina van der Biest- Oduber. Di e matrimonio aki a nace seis yiu cual tur seis a lanta den e cas aki. Un di e yiunan Frederica van der Biest- Eman a casa cu John Gerard Eman, fundado di e prome instituto financiero di Aruba, Aruba Bank.

For di aña 1999 e cas a keda inhabita y no a ser usa mas.

Na aña 2000 cu e meta pa preserva e casita aki pa futuro generacionnan y evita e bay perdi a dicidi pa muda esaki pa un ubicacion nobo na Weststraat.

Pa aloca e monumento a busca un tereno den Oranjestad mes, pasobra akinan ta caminda cu e cas di cunucu mester a keda, mirando cu ta den e area aki so por a haya e tipo di casnan aki. Un otro punto importante tabata cu mester a haya un tereno caminda por a aloca e cas mescos cu na su tereno original, na un distancia di 14 meter for di e rooilijn; esaki ta ser considera un ubicacion historico. Asina a logra yega na e tereno caminda e edificio ta actualmente despues cu e tereno a keda traspasa pa Stichting Monumentenfonds Aruba. Esaki ta e unico biaha cu na Aruba a muda un monumento completamente.

Despues di a fungi como museo, oficina, y restaurant, awor e Casita Geel lo ta e cas nobo di un luga cu ta bay ta un espacio familiar cu lo ofrece tour y actividadnan pa publico.